

Sabellij / vnd seines gleichen / fur Jüden /
Mahmet / vnd wer sie mehr sind / die klüger
sind / denn Gott selbs / vnd menge die Per-
son nicht in eine Einige Person / Sondern be-
halte in rechtem Christlichen Glauben / drey
vnterschiedliche Personen / in dem einigen
Göttlichen ewigen wesen / die doch alle drey /
gegen vns vnd die Creaturn / ein Einiger
Gott / Schepffer vnd Wircker ist aller dinge.

Dis alles ist villeicht vns Dentschen
scharff oder subtil / vnd solt billicher in den
Schulen bleiben / Aber weil der Teuffel den
schwantz reget / in dieser letzten zeit / als wolt
er gerne allerley Ketzerey wider auffwecken /
Vnd die Welt on das Lüstern vnd Toll wor-
den ist / newes zu hören / vnd vberdrüssig der
heilsamen lere (wie Sanct Paulus weissagt)
damit dem Teuffel die Thür auffgesperret
sind / hinein zu führen / was er wil / So ist's nutz
vnd not / das doch ettliche / beide Leien vnd
Gelerten / sonderlich Pfarrherrn / Predigere /
vnd Schulmeistere / von solchen nötigen Ar-
tickeln vnser Glauben auch lernen dencken /
vnd Dentsch reden / Wem es aber zu schwer
ist / der bleibe mit den Kindern bey dem Cate-
chismo / vnd Bete wider den Teuffel vnd seine
Ketzerey / wider Jüden vnd Mahmet / damit
er nicht gefüret werde in anfechtung / Da-
rumb weil wir drauff komen sind / wollen wir
denen /